

四庫全書

經部

欽定四庫全書

毛詩講義卷十

宋 林岵 撰

魯頌

駟駟牡馬在坰之野薄言駟者有騶有皇有驪有黃以  
車彭彭思無疆思馬斯臧 駟駟牡馬在坰之野薄言  
駟者有騶有駟有駟有駟以車伾伾思無期思馬斯才  
駟駟牡馬在坰之野薄言駟者有騶有駟有駟有駟  
以車繹繹思無斁思馬斯作 駟駟牡馬在坰之野薄

言駟者有駟有駟有駟有魚以車祛祛思無邪思馬斯  
祖

駟駟然腹幹肥張者所牧養之良馬也在圻之野邑  
外曰郊郊外曰牧牧外曰野野外曰林林外曰圻一  
章薄言駟者驪馬白跨曰驪黃白曰皇純黑曰驪黃  
而微駢曰黃出車彭彭有力有容由僖公之思無疆  
竟故馬斯善也二章蒼白雜毛曰騅黃白雜毛曰駟  
赤而微黃曰駢青而微黑曰騅出車伍伍有力由思

無期故思馬斯才也三章青驪驎曰驪白馬黑鬣曰  
駱赤身黑鬣曰駱黑身白鬣曰雒出車繹繹善走由  
思無斃厭思馬斯可用也一曰始也俶也四章陰白  
雜毛曰駟彤白雜毛曰駟一目白曰矐兩目白曰魚  
豪毛在鬣而白長曰驪出車祛祛強健由思無邪思  
故思馬斯往也孔云一章良馬朝祀所乘二戎馬齊  
力三田馬齊足四駕馬給雜使貴肥壯思無邪三字  
乃聖人取以斷三百篇然則史克古之立言者與

有駉有駉彼乘黃夙夜在公在公明明振振鷺鷥于  
下鼓咽咽醉言舞于胥樂兮 有駉有駉彼乘牡夙  
夜在公在公飲酒振振鷺鷥于飛鼓咽咽醉言歸于胥  
樂兮 有駉有駉彼乘駟夙夜在公在公載燕自今  
以始歲其有君子有穀詒孫子于胥樂兮

四馬曰乘有駉然肥強乘黃之馬升高致遠得為人  
用猶僖公之羣臣有賢能也早夜在于公所明德明  
義所以為賢臣也振振然羣飛潔白之鷺下而集止

猶僖公之羣臣集止君朝相與閒暇燕飲也以鼓節  
樂其聲咽咽至于無算爵而醉為君起舞以盡其歡  
君臣皆喜樂兮二章既下而飛喻醉而欲退也醉而  
言歸則不失德矣三章青驪曰駟君臣有道可致陰  
陽和順從今以為初始歲其常有豐年僖公之善道  
可以遺其子孫故于是君臣皆喜樂兮詩言在公載  
燕因即據燕為今

思樂泮水薄采其芹魯侯戾止言觀其旂其旂戔戔鸛鳴

聲噦噦無小無大從公于邁 思樂泮水薄采其藻魯

侯戾止其馬蹻蹻其馬蹻蹻其音昭昭載色載笑匪怒伊

教 思樂泮水薄采其芣魯侯戾止在泮飲酒既飲旨

酒永錫難老順彼長道屈此羣醜 穆穆魯侯敬明其

德敬慎威儀惟民之則允文允武昭假烈祖靡有不孝自

求伊祐 明明魯侯克明其德既作泮宮淮夷攸服矯矯

虎臣在泮獻馘淑問如臯陶在泮獻囚 濟濟多士克

廣德心桓桓于征狄彼東南烝烝皇皇不吳不揚不告于

詆在泮獻功 角弓其觶東矢其搜戎車孔博徒御無  
斃既克淮夷孔淑不逆式固爾猶淮夷卒獲 翩彼飛  
鵑集于泮林食我桑黹懷我好音憬彼淮夷來獻其琛  
元龜象齒大賂南金

泮宮之外水中有芹人言已思樂往泮宮之水薄采  
其芹公之來此泮宮也我觀其旂文章法度葳蕤然  
鸞則噦噦有聲車服得宜行趨中節魯之臣民無小  
無大皆從公往行而至泮宮言公之賢人樂見之也



藻茹亦水菜也或曰茹蓴也或曰鳧葵也人樂觀化  
非止采菜既采其菜又觀其化甚言樂之也馬蹻蹻  
而強壯德音昭昭而明毛云色溫潤鄭云和顏色而  
笑語非有所怒於是教化魯侯至泮召先生君子與  
之行飲酒之禮天與以難老之福而順彼仁義之長  
道以收此羣衆人民頌之之辭也先生卿大夫致仕  
者君子有德不仕者鄉飲鄉射之禮皆以明日息司  
正而行小飲徵唯所欲告於先生君子古者天子將

出征受命於祖受成於學定兵謀也諸侯之禮亦然  
鄭箋以羣醜為淮夷因飲酒而謀事序謀行伐克之  
由穆穆然美哉魯侯敬明其德又敬謹其舉動威儀  
內外皆善維為下民之所法則信有文矣信有武矣  
昭假于功烈之祖備美而格先蓋靡有不孝不恭而  
能自求伊祐也明明然有明德之魯侯能明其德既  
為泮宮以行德化謀伐淮夷淮夷順服其有功而歸  
也矯矯然威武如虎之臣在宮之內獻其截耳之馘

善問獄如臯陶者又獻其所執之囚服罪之人生執而係虜之則執訊者也察獄之吏受其辭而斷其罪濟濟多士謂羣臣也克廣其德心以上廣其君之德心威武其征伐之客遠服彼東南淮夷之國多士之德烝烝然而厚皇皇然而美不為過誤不有損傷于軍旅之間更無忿競其歸也不有告于有司爭訟之事惟獻其戰功而已角弓以下言淮夷望而即服角弓其觥然弛而不張束矢其搜然衆而不用其兵車

甚博大徒行御車之人皆敬其事無厭倦者既能克  
服淮夷甚化於善而不復為逆亂由僖公用能謹固  
其所謀之道故淮夷盡獲其心服也翩彼飛鴉惡聲  
之鳥亦知集于我泮水之林食我桑實就我好音喻  
不善之人感恩惠而從化憬然而遠行者是彼淮夷  
來獻其國大龜尺二寸象齒南金特舉貴者而言非  
唯此等也南金出於荆揚其金三品則王肅以為金  
銀銅鄭玄以為青白赤而爾雅黃金之美曰鏐白金

曰銀大賂者賂君及卿大夫襄二十五年齊人賂晉侯自六正五吏三十帥及處守者皆有賂

閔宮有恤實實枚枚赫赫姜嫄其德不回上帝是依無災無害彌月不遲是生后稷降之百福黍稷重穰稊稷藂麥奄有下國俾民稼穡有稷有黍有稻有秬奄有下土續禹之緒后稷之孫實維大王居岐之陽實始翦商至于文武續大王之緒致天之屆于牧之野無貳無虞上帝臨女敦商之旅克咸厥功王曰叔父建爾元子

俾侯于魯大啓爾宇為周室輔 乃命魯公俾侯于東  
錫之山川土田附庸周公之孫莊公之子龍旂承祀六  
轡耳耳春秋匪解享祀不忒皇皇后帝皇祖后稷享以  
騂犧是饗是宜降福既多周公皇祖亦其福女 秋而  
載嘗夏而禘衡白牡騂剛犧尊將將毛毳載羹籩豆大  
房萬舞洋洋孝孫有慶俾爾熾而昌俾爾壽而臧保彼  
東方魯邦是常不虧不崩不震不騰三壽作朋如岡如  
陵 公車千乘朱英綠縢二矛重弓公徒三萬貝冑朱

綏烝徒增增戎狄是膺荆舒是懲則莫我敢承俾爾昌  
而熾俾爾壽而富黃髮台背壽胥與試俾爾昌而大俾  
爾耆而艾萬有千歲眉壽無有害泰山巖巖魯邦所  
瞻奄有龜蒙遂荒大東至于海邦淮夷來同莫不率從  
魯侯之功保有鳧繹遂荒徐宅至于海邦淮夷蠻貊  
及彼南夷莫不率從莫敢不諾魯侯是若天錫公純  
嘏眉壽保魯居常與許復周公之宇魯侯燕喜令妻壽  
母宜大夫庶士邦國是有既多受祉黃髮兒齒徂來

之松新甫之柏是斷是度是尋是尺松栢有舄路寢孔碩新廟奕奕奚斯所作孔曼且碩萬民是若

姜嫄之廟在周所閔之宮佺然清靜實實廣大枚枚  
磐密月朔四時祭所不及或因大祭而別祭之其在  
魯也禘宮歟赫赫顯著者姜姓之女名嫄其德貞正  
不回邪天用依其所生之子在母之時無災殃患害  
終人道十月而生之不遲晚乃是后稷降以百福使  
有明哲之性曉稼穡之事與之黍與之稷先種後熟



之重後種先熟之糝先種之種後種之穉及菽之與  
麥天與衆穀令稷種之同有天下諸國使民知稼穡  
之道言其所有又有稻有黑黍同有天下之土以繼  
大禹之業大王自豳居岐山之陽實始有翦齊商家  
之兆文武繼大王之業於時商家暴虐天欲誅之武  
王乃致天之誅於牧野之地無貳無虞上帝臨汝通  
天人爲一也治商之臣民同成其功則周公相之也  
王曰叔父立爾元子伯禽使侯于魯大開爾居為周

室輔侯於東方賜之境内山川土田并小國之附庸  
名山大澤不以封又公無附庸皆特賜之也周公之  
孫莊公之子僖公也交龍之旂承奉宗廟祭祀所乘  
四馬其六轡耳耳至盛春秋四時非有懈怠所饗所  
祀不有忒變皇皇后帝天也與皇祖后稷魯得祭者  
以成王命魯得郊耳明堂旂十二旒祀帝此之龍旂  
宗廟祭也饗以赤牛純色是饗是宜多與之福周公  
與皇祖伯禽亦其福汝秋而嘗祭夏而福衡其牛設

木于角以福之使不觝觸又衡設於鼻白色之牡赤  
色之特白周公牲駢魯公牲也犧尊則將將然盛美  
大和中魯郡得齊大夫子尾犧尊乃尊為犧牛形王  
許宜反鄭素何反其饌則有去毛而魚之豚又有切  
肉之載與登之大羹不和鉶羹菜和其食器有竹籩  
木豆大房之俎大房鄭以為玉飾俎足間有橫下有  
附似乎堂後有房執干戚而萬舞者洋洋衆多頌者  
設詞慶之曰使汝得福熾盛而昌大使汝年命長壽

而臧善安彼東方之國魯邦是其常有其堅固如山  
不可虧損不可崩落其安靜如川不震動不騰涌國  
之三壽考之卿與為朋友又如岡如陵也上既美其  
祭祀鬼神此又美其用兵征伐公之兵車有千乘矣  
車上皆有三人右持朱色之英左持綠色之繩二矛  
載於車上皆朱為英飾重弓共在壘中以綠繩束之  
又公之徒衆有三萬人以貝飾冑其甲以朱綬繩綴  
之烝進之徒增增衆多西戎北狄以此膺之荆楚羣

舒叛逆者以此懲創之軍之所征往無不克則無有  
敢禦止我者喜其討罪設辭慶之使汝昌大而熾盛  
使汝長壽而富足黃色之髮台文之背如此之人壽  
而相講試勇力奇其老而不衰也又重慶之使爾得  
福則昌而且大使汝年壽則耆而又艾使得萬有千  
歲爲秀眉之壽無有患害也地雖廣大坊記云制國  
不過千乘兵車一乘甲士三人步卒七十二人千乘  
七萬五千人六軍矣天子六軍出六鄉萬二千五

百家為鄉萬二千五百人為軍諸侯三軍此云千乘計地出兵鄉之出軍是正故家一人計地則非常故成出一車春秋襄十一年經書三軍明已前無三軍鄭意以周公伯禽七百里合有三軍其實二軍誇言之耳又公徒三萬箋以三萬為三軍畧其七千五百舉成數其實盛言之也僖四年齊伐楚十年齊伐北戎其從伯主之令歟泰山巖巖以下又言復宇之功泰山巖巖魯國所共瞻又有龜山蒙山包有極東之

地至于近海之國淮夷來與之同服莫不相率而從  
中國魯侯之功也龜陰東蒙魯地泰山齊魯界海岱  
淮魯三望大東之國如邾莒滕杞與安有其鳧山繹  
山嶧嶧陽也遂有是徐方之國至于近海之國淮夷  
為蠻貊之行者及彼南方之夷謂荆楚之國莫不相  
率而從于中國莫敢不應諾順從中國之命惟魯侯  
是順也天與之大福使有秀眉之壽而保有魯國居  
常邑與許邑皆鄙邑也許田魯朝宿之邑鄭伯常假

之毛以常許為魯南鄙西鄙孔曰尸致福於主人皆謂之嘏復周公之宇復周公之故居也僖公燕飲而喜其燕于內寢則善其妻壽其母謂為之祝慶使妻善而母壽其燕于外寢則宜其大夫與眾士亦謂為之祝慶使與之相宜也邦國常保有之既多受福又有黃髮兒齒享有永年兒齒壽證也徂徠山之松新甫山之柏斬斷之量度之八尺之尋十寸之尺用松為桷煇然而大修其正寢甚寬大矣又新為閔公之



廟奕奕廣大寢成則人安廟成則人悅言其興廢補  
敝也廟乃奚斯所為甚長而且大國人順之不憚劬  
勞也鄭以新廟為姜嫄其餘寢廟亦皆修之桷與椽  
椽之別名奚斯公子魚也

商頌

猗與那與置我鞀鼓奏鼓簡簡衍我烈祖湯孫奏假  
綏我思成鞀鼓淵淵嘒嘒管聲既和且平依我磬聲於  
赫湯孫穆穆厥聲庸鼓有數萬舞有奕我有嘉客亦不夷

懌自古在昔先民有作溫恭朝夕執事有恪顧予烝嘗  
湯孫之將

樂器有鞀鼓有鐘有鼓有管有磬蓋湯伐桀興商之  
後功成所制樂其器雖因于虞夏而大濩之音則自  
成一代之樂矣鞀者樂之成也後世祀湯而頌其成功  
以樂舞言之其曰湯孫者成湯也言湯之為人子孫也  
其曰烈祖者謂湯之祖契冥相土之屬也其曰嘉客  
者虞夏之後及諸侯來助祭也猗與那與美湯之功

多也湯之護樂蓋命伊尹爲之歌晨露九招六列以見其善植置同音鞀鼓如鼓而小以木貫而持其柄搖之旁耳自擊明堂曰楹鼓為楹貫而樹之也鼓聲簡簡和大奏以樂我有功烈之祖湯之奏樂以感格鬼神蓋欲綏我心之思成也鞀鼓則淵淵其聲深而遠聞矣管籥之聲則嘒嘒而清烈矣鐘鼓磬管俱爲樂懸在下琴瑟在上而鳴球玉磬亦在堂上以爲歌節玉聲清越以長樂本于聲而聲歌依于玉故虞書曰夏擊鳴球搏拊琴

瑟以詠而商頌曰既和且平依我磬聲也於赫乎湯孫  
哉穆穆而美者其樂之聲也樂則有大鐘矣又有鼓矣  
黻然而盛執其干戈為萬舞者綴兆又奕然而閑習我  
商家之嘉客其來助祭豈不怡悅而懌樂乎虞書曰虞  
賓在位羣后德遜即此之謂凡樂聲和平人心肅敬皆  
由溫恭于朝夕無事之時而恪祗于臨事之際此古曰  
在昔昔曰先民之所共守也其所興造見于禮樂皆由是  
也顧予烝嘗此一句變我為予乃繼湯而頌乎湯者之

言其意若曰予今日之獲奉烝嘗湯尚予顧其將且大本之湯乎春祠夏禘秋嘗冬烝詩人或取協韻而言耳

嗟嗟烈祖有秩斯祐申錫無疆及爾斯所既載清酤賚我思成亦有和羹既戒既平駿假無言時靡有爭綏我眉壽黃耆無疆約軼錯衡八鸞鶻鶻以假以享我受命溥將自天降康豐年穰穰來假來饗降福無疆顧予烝嘗湯孫之將

按此篇永樂大典缺卷

天命玄鳥降而生商宅殷土芒芒古帝命武湯正域彼

四方方命厥后奄有九有商之先后受命不殆在武丁  
孫子武丁孫子武王靡不勝龍旂十乘大韜是承邦畿  
千里維民所止肇域彼四海四海來假來假祈祈景員  
維河殷受命咸宜百祿是何

簡狄吞玄鳥卵此乃緯書不待辨矣毛曰春分燕降  
高辛氏率有娥氏女祈于郊禡而生契故本其爲天  
所命以玄鳥至而生焉孔曰春分玄鳥至氣候之常  
記其祈福之時故云天命玄鳥蓋嘗思之玄王桓撥

契謂之玄也商人禘嚳而郊冥冥即玄冥亦謂之玄也鄭注冥契六世孫其官玄冥水官也春秋傳少昊以鳥名官有玄鳥氏豈其苗裔與不敢質也國語玄王勤商十四世而興鄭又信緯書云商水帝本黑帝汁光紀之精曰玄朱氏曰本玄鳥至之時祈福而生故曰玄天之命商自玄鳥至而有娥為帝嚳次妃祈福於高禖之時矣契之生也佐禹治水而敷教堯封之商而賜姓曰子其宅居殷土芒芒而廣大商而曰

商丘者商丘別地名關伯居商丘相土代之自契至湯八遷而國號不改其實商者商人之國號湯以商受命猶周人以周受命耳商而曰殷者盤庚遷殷改號曰殷兼取二號而言之曰殷商不全改也商而曰亳者湯在亳地居郊特牲有亳社不舉代號舉湯所居見紂滅亡之紂滅之時則在朝歌書序契至湯八遷湯始居亳又曰盤庚五遷將治亳殷殷是亳地之小別名孔曰梁國有二亳南亳在穀熟之地即湯都



北亳在蒙地即景亳湯受命地偃師為西亳即盤庚  
治亳殷所徙然則殷有三亳二在梁一河洛之間也  
漢地理志河南郡偃師縣有尸鄉湯所都總言之耳  
立政曰三亳阪尹鄭以為湯舊都之民分為三邑其  
長居險東成臯南轅轅西降谷分亳民為三處非三  
處有亳地杜預以景亳為周河南鞏縣西南有湯亭  
即偃師臣瓚云湯居亳濟陰亳縣有湯冢己氏有伊  
尹冢其說各異存之商而曰宋者地理志周封微子

於宋今之睢陽本陶唐氏火正閼伯之墟高辛之伯  
子遷於商丘主辰其封域在禹貢徐州泗濱西及豫  
州盟豬之野微本采地名微子歸周武王克商先封  
於宋未得為殷後而武王即將畿內千里之地分國  
為三以其京師封紂子武庚為殷後置三監使管叔  
蔡叔霍叔尹而教之自紂城而北曰邶南曰鄘東曰  
衛成王時三監導武庚畔既殺武庚伐三監更於此  
建三國以殷餘民封康叔於衛為長又有邶有鄘二

國後世子孫并而有之頃公之前然矣地理志又曰  
遷邛郫之民於洛邑所謂餘民不遷者乎成王既黜  
武庚之殷命微子為殷後以奉承先王而為微子之  
命商之禮樂祭祀盡在宋矣河內本殷時畿內舊都  
封域在禹貢冀州大行之東北踰衡漳東及兗州桑  
土之野此鄭所譜也凡此皆學者所當考也自然謂  
之天主宰謂之帝帝即天也古帝命我聖武之湯湯  
本寬仁而以武稱者人君當有威斷耳帝之命湯也

表正疆域彼四方方徧命乎羣后奄覆總有乎九有而商之先君后君也通天子諸侯而言其先君受天之命不至解怠者在武丁中興耳武丁為商孫子以威武之德王天下靡所不勝任實克負荷也以言其祭祀則有諸侯之助祭其車十乘而建龍旂以承其黍稷之粢盛古者諸侯舍車於館乘墨車以朝而龍旂不改以言其京邑則王畿千里之內民安其居商衰復興始推而正疆域於四海以言其天下則四海

諸侯與其臣民來至者祈祈而衆多景大也員均也維何鄭本為河改云河之言何也其大且均維何哉信矣殷家受天之命慶無不宜而百祿是任在於契與湯為之祖而武丁為之孫子也

濬哲維商長發其祥洪水芒芒禹敷下土方外大國是疆幅隕既長有域方將帝立子生商 玄王桓撥受小國是達受大國是達率履不越遂視既發相土烈烈海外有截 帝命不違至于湯齊湯降不遲聖敬日躋昭

假遲遲上帝是祗帝命式于九圍 受小球大球為下  
國綴旒何天之休不競不綽不剛不柔敷政優優百祿  
是適 受小共大共為下國駿厖何天之龍敷奏其勇  
不震不動不難不竦百祿是總 武王載旆有虔秉鉞  
如火烈烈則莫我敢曷苞有三蘂莫遂莫達九有有截  
韋顧既伐昆吾夏桀 昔在中葉有震且業允也天子  
降于卿士實維阿衡實左右商王

濬哲者古聖人之明明德舜之所以為舜湯之所以

為湯莫不在是堯之聰明文思舜之濬哲文明皆淵  
深而明知詩人述商之大禘蓋自嚳至契自契至相  
土自相土至湯總以濬哲維商言之商德大矣濬深  
也哲智也長發其祥其來久矣自堯之時洪水芒芒  
而大禹敷廣下土去水之患正四方京師之外大國  
畫其疆境幅廣隕周且長遠矣是時也有契佐禹治  
水而敷教原契之生乃其母有娀方將將者大也玄  
王即契也桓撥武而能治也所受小大之國皆能達

其政教由其循行天理無所踰越遂視其民則既發  
以應之矣相土者契之孫昭明之子也為王官之伯  
出長諸侯任征伐之事蓋居夏后之世者也其威武  
之盛烈烈然四海之外聞風整齊有截其所商之積  
功著矣天命未嘗去商故曰不違至于湯而動合天  
意與天心齊也所謂克配上帝其聖明恭敬之德日  
躋升而進進降已則不遲所謂惟學遜志昭假則遲  
遲所謂上達而悠久純一而不已上帝是祗敬天也



帝命式于九圍帝命之為君為法於天下也圍九州各有規圍也小球鎮圭尺有二寸王所執大球琕長三尺王所摺為天子乃用此故曰受小球大球琕者玉也禹貢曰球琳琅玕湯之執圭摺琕為下國綴屬如旒之綴於旗繆蓋德為人之所歸則下國有所係下國如旒湯如旒之所綴者所以荷天之福否則春秋所謂君若贅旒是上反繫屬於下也湯之不爭競不隸急不太剛不過柔敷政優優而和百祿是聚受

小國之貢受大國之貢非以厲民也乃所為下國之駿大厖厚者也諸侯有以貢乎天子大夫有以承乎諸侯士庶人有以承乎大夫是厚下之道也否則無以相生相長而相安矣抑古聖人所謂四方惟正之供所以荷天之寵湯之不可震不可動不懣恐不竦懼陳進其勇所征無敵后來其蘇故百祿是總總亦適也書曰惟我商王布昭聖武詩曰古帝命武湯聖人之德乃武乃文湯以伐暴為事故本其聖武而言

之湯以武功王天下也載其旌旗以出征伐執其鉞  
鉞以恭行天罰其威勢如火之烈烈莫敢禦我苞本  
也本則夏桀有旁生三蘂若韋若顧若昆吾三國同  
惡韋豕韋彭姓顧昆吾已姓湯征不義使之莫獲遂  
達其長蛇封豕之心而凡有諸侯截然齊一以歸湯  
其兵所加先韋顧而後昆吾夏桀也昔在中葉可謂  
有討伐之威又有興王之功業自契而言相土至湯  
皆中葉信也商之為天所子而又生我家之卿士是

惟伊尹為之阿衡伊氏也尹正也摯名也阿衡倚而  
取平也太甲尊伊尹曰保衡是天民之先覺者左右  
商王一德格天矣

捷彼殷武奮伐荆楚罽入其阻裒荆之旅有截其所湯  
孫之緒維女荆楚居國南鄉昔有成湯自彼氐羌莫  
敢不來享莫敢不來王曰商是常天命多辟設都于  
禹之績歲事來辟勿予禍適稼穡匪解天命降監

下民有嚴不僭不濫不敢怠遑命于下國封建厥福

商邑翼翼四方之極赫赫厥聲濯濯厥靈壽考且寧以  
保我後生 陟彼景山松柏丸丸是斷是遷方斲是虔  
松栢有挺旅楹有閑寢成孔安

撻疾意撻然而疾者彼殷王武丁之威武奮伐荆楚  
之不朝荊州也楚國也楚始封于周曰熊繹自商以  
上未聞深入其險阻裒聚其旅衆使之安平帖服有  
截其所美武丁之功繼湯孫之緒業也惟女荊楚以  
下一章述告責之辭見古人用兵脩文告之意責之

若曰惟女荆楚雖遠居國南鄉昔在我成湯之時自  
彼西戎氏羌莫敢不脩饗獻世見之禮汝比氏羌為  
近冒為不來哉天命多辟以下一章言天命衆君諸  
侯各設都于禹績自高宗伐荆楚之後莫不脩其歲  
事來見于王以祈王之不譴曰予維稼穡不怠庶可  
免矣天命降監以下一章頌高宗也言天之視聽自  
民民有嚴矣不僭濫于刑賞不敢怠惰而遑安則天  
命之于下國封殖其福惟高宗之能然所以興也商

邑翼翼以下一章又頌高宗也京師禮俗翼翼可則  
四方取中赫赫顯盛之美聲濯濯然光明之威靈  
高宗之饗國五十年可謂壽考康寧而保我子孫矣  
陟彼景山一章蓋廟成而祭也陟彼景大之山一曰  
景毫之山取其松柏之丸丸滑易而調直者是斷是  
徙又方正斲之而有敬其斷截以為桷則長以為楹  
則衆而大寢廟中之寢也孔安者所以安高宗之神  
也

欽定四庫全書

經部

毛詩講義卷十一

詳校官監察御史<sub>臣</sub>邱庭澍

通政使司副使<sub>臣</sub>莫瞻菴覆勘

謄錄監生<sub>臣</sub>章

儔



欽定四庫全書

毛詩講義卷十一

宋 林呂 撰

詩序一

關雎后妃之德也風之始也所以風天下而正夫婦也  
故用之鄉人焉用之邦國焉風風也教也風以動之教  
以化之詩者志之所之也在心為志發言為詩情動於  
中而形於言言之不足故嗟歎之嗟歎之不足故永歌  
之永歌之不足不知手之舞之足之蹈之也情發於聲

聲成文謂之音治世之音安以樂其政和亂世之音怨以怒其政乖亡國之音哀以思其民困

詩之大序當自此始詩者志之所之也始曰心曰志曰情曰言曰詩曰嗟歎曰永歌曰聲曰音學者不可不細辨也易書禮春秋皆言而止惟詩言之不足係乎勸善戒惡之情動盪於中不自已也詩之在心為志心則寂然不動志則已有所思情則所思勸善戒惡之正而止乎禮義中庸所謂喜怒哀樂愛惡欲發而皆

中節謂之和者由有情故動盪而為言言而成篇章  
則為詩然詩人之情言一人之善以勸天下後世之  
善言一人之惡以戒天下後世之惡自有優柔巽入  
之妙抑揚感慨之深故發言為詩可以詩名自言之  
不足至於永歌可以聲名而及其聲之成文則不徒  
以二者名而謂之音矣可以詩名三百篇是也可以  
聲名朱文公所謂言嗟歎永歌皆聲也皆情發於聲  
也蓋為詩者其中寓言之不足而且嗟且歎且歌之

意賦詩者諷誦弦歌其所抑揚高下清濁疾徐疏數之節相應而和一唱三歎又皆誦言之不足而嗟歎永歌之其聲纍纍如貫珠若記之歌商歌雅此所謂聲手舞足蹈籟鳴機動也不徒以二者名而可謂之音者蓋言與嗟歎永歌三者單出之聲雜比而成文理則乃謂之音言成篇章歌成音調此則詩之獨而非他經比然而情有正否詩人之情皆正也世有治亂興亡詩人所感不同也故生乎治而為詩者其音

安以樂生乎亂而為詩者其音怨以怒生乎亡國而為詩者其音哀以思其賦誦之者亦然識者可以其音而知其政假如玉樹後庭花之詩在陳歌之人知其亡在唐歌之可想陳之亡徵唐太宗遽以為當唐之世儘歌此詩無關治亂此亦非也治世有治世之詩其音安以樂者本乎治而成因其成而歌君臣民物相感以永其和安用歌亂世亡國之詩於庭為哉又如亂世之時人思治世而為詩雖述文武成康之

美而意在戒乎幽厲其音自有怨以怒之微旨此則  
大田楚茨之類是也或曰音則然矣詩之音與樂之  
音孰辨曰大序乃論詩之音也虞書乃論樂之音也  
樂之初未有不本於詩者凡樂器以人聲為主人聲  
以詩詠為則故舜曰詩言志歌永言聲依永歌永言  
即序之所謂言嗟歎永歌也聲依永即序之所謂聲  
成文也至於律和聲八音克諧無相奪倫則說樂之  
六律六呂以此十二物者和人之聲而施之八音金

石絲竹匏土革木無不克諧又如夔之論樂搏拊琴瑟以詠詠之一字專主人聲謂升歌而歌詩所謂言與嗟歎永歌皆總在詠之一字妙矣而玉磬琴瑟搏拊笙鏞下管則皆樂器協於律呂具乎八音以宣輔詠之一字此則詩之協於樂而樂之和乎聲也如今人唱曲樂器有黃鍾大呂而音調亦有黃鍾大呂此六律八音之和諧人聲而人聲之亦合乎律呂八音也故詩序之言音與虞書之言音不可不辨然而此

則論詩耳欲求情之正又當細用工夫易曰利貞性情也註者以為情其性則非正性其情則正矣非先正其情安能勸戒他人乎非存其心養其性又安能性其情乎

故正得失動天地感鬼神莫近於詩先王以是經夫婦成孝敬厚人倫美教化移風俗

此蓋總言三百五篇之詩其功用如此然不可不細論詩者太平之樂經虞夏商以前未論自周言之周



公當成王之時制為樂章謂之樂經以授之太師施  
之郊廟朝廷與夫王之起居燕寢而又有達於邦國  
鄉人可通用者其風則關雎麟趾鵲巢騶虞其小雅  
則鹿鳴至菁莪其大雅則文王至卷阿其頌則清廟  
至般此皆仁義禮智之言祖宗功德之盛天命人心  
之所係國俗王化之所基由此觀之治世之詩祭祀  
賓客燕居出入弦誦而歌吹之可以正君臣民物之  
得失動乎天地感乎鬼神而先王以之經正乎夫婦

如孟子所謂經正則庶民興成乎孝親敬長之義厚  
乎人倫美乎教化移乎風俗本三綱之正當時親炙  
而和平後世聞風而感發漸漬日化而不自知誠莫  
近乎詩之教也若夫世更治而為亂風雅更正而為  
變國史所錄聖人所刪而僅存者精微要妙頓挫沉  
鬱長吁永歎廣言曲譬亦可以正可以動可以感可  
以經可以成可以厚可以美可以移而序者之意第  
言先王恐主乎治世之詩指成周盛時而言若亂世

之詩變風變雅存為鑒戒亦本乎先王以詩教天下之意也且正得失主人心而言也動天地感鬼神主交神而言也經夫婦至移風俗主齊家治國平天下而言也詩之功用所以能如此者孔子曰詩三百一言以蔽之曰思無邪夫思無邪者誠也誠者即性其情之謂也至誠之道不言而信不動而章無為而成况乎形於聲詩歌詠之間乎且夫聞祈招之音使其能自克則克念而聖矣聞角招之詩使其不能興發

補不足則亦罔念而狂矣舉此一端詩可以正人心  
之得失上智之人聞詩而省有得無失中智之人聞  
詩而省正得與失下智之人聞詩而不知省其失不  
可正而其得又安在哉舉此一端詩雖可正人心之  
得失而又在乎人心之知所自正也苟為不然執柯  
伐柯猶以為遠自經夫婦以下皆然不能徧舉天地  
鬼神亦不特周禮奏樂降神之謂和平怨怒之極足  
以達陰陽之氣而致祥召災天地之心鬼神情狀洋

洋洋如在自有所感動矣

故詩有六義焉一曰風二曰賦三曰比四曰興五曰雅  
六曰頌上以風化下下以風刺上主文而譎諫言之者  
無罪聞之者足以戒故曰風至於王道衰禮義廢政教  
失國異政家殊俗而變風變雅作矣國史明乎得失之  
迹傷人倫之廢哀刑政之苛吟咏情性以風其上達於  
事變而懷其舊俗者也故變風發乎情止乎禮義發乎  
情民之性也止乎禮義先王之澤也

詩有六義風雅頌者詩之體賦比興者詩之用賦鋪陳  
也比取譬也興托物而有感也自風雅頌定體而言之  
則風主感動雅主齊正頌主贊美自風雅頌雜用賦比  
興之理而言之則一篇之中或有賦或有比或有興有  
各得其一義者有一篇而全具者有一篇而兼具者體  
不易用相參敘賦比興於風之下見雅頌之亦具此義  
也鄭謂七月之篇有風雅頌孔謂六義皆謂之風其說  
難從自上以風化下之後當分為三節解先言風之

所以名風者何也謂風有風動之義上以風化下如  
周公制關雎麟趾為王者之風鵲巢騶虞為諸侯之  
風皆言正家之道所以風天下而化夫婦者又如周  
公述豳國七月之風皆純乎上以風化下之美也又  
如周南文王之國風召南文王之國風乃上以此風  
化下而下以此風美上者也至十二國之變風亦由  
夫上以此不美之風化下故下以此不美之風刺上  
而存乎採詩之官著於國史之錄主於成文之婉妙

而中有微諫故言者無罪聞者知戒而亦可以風名  
此變風之所以附乎正風也若無巽入之義聖人其  
刪之矣又言變風變雅之為變者何也王道盛道德  
一風俗同則詩有正而無變所謂太平樂經之外無  
詩也王道衰禮義廢政教失國異政家殊俗然後有  
變風變雅之詩正風之化不行於是有變風之刺雖  
美鄭武衛文皆變中之正亦如二南在周為美自商  
末言之變中之正也七月在豳為美自周初言之變



中之正也大雅小雅之正盡廢矣於是王朝之公卿  
陳古刺今而有變小雅變大雅雖先王之見美而昔  
之所無今之所有亦皆變中之正也國史者諸國皆  
有史氏因採詩而備錄之蓋明乎得失之迹傷人倫  
之廢哀刑政之苛至其為是詩也皆吟咏其情性以  
風其上達於事變而懷其舊俗者也所以錄於下而  
陳於上著於今而示於後也又言變風之發乎情止  
乎禮義者何也變雅多出於王朝之公卿變風多出

於其國中小夫賤隸婦人女子之口而或者國之卿  
大夫士君子採取其言而為之者然得列於變雅而  
附乎正風則聖人必有以取之矣蓋取其發乎情止  
乎禮義也人生而稟乎天之所賦者曰性至善具足  
一毫無偽雖有氣之清濁才之智愚而性之本然此  
理湛徹故曰人生而靜天之性也感於物而動性之  
情也謂之情則其所發者必有所偏矣有所偏則不  
得其正而不能勸善懲惡矣今也詩人之詩發乎真

情斯為性其情者性其情者又本乎先王也被夫先王之澤而誦治世之詩久矣耳聞目擊躬行心詠皆此熟境也一旦忽見其君父兄與其國人子弟設施注措有異於前日焉安有不陳禮秉義以切磋之乎此所謂流澤之深自葉徂根也使其情不本於性言不本於禮義聖人其刪之矣

是以一國之事繫一人之本謂之風言天下之事形四方之風謂之雅雅者正也言王政之所由廢興也政有

小大故有小雅焉有大雅焉頌者美盛德之形容以其成功告於神明者也是謂四始詩之至也

一國之事係一人之本謂之風謂一國之事皆係國君風化之本若曹奢衛淫秦強晉弱之類又如王朝詩不出境儕於國風之類又如商之既衰周之始興周南之地化乎文王而有周南國風召南之地化乎文王而有召南國風之類又如豳之一國千百年風俗周公遭變陳之為豳國風之類皆一國之事係一

人之本也此其本於社席施於國都著於耕桑隴畝之間而動化之妙詩能言之故謂之風也言天下之事形四方之風謂之雅此謂凡大小雅若干篇雖正變不同所言皆總天下之事合四方之風而係於天子之身故謂之雅也雅者正也謂其所言先王之政齊正乎天下者故謂之雅者正也言王政之所由廢興也政亦正也小雅自菁莪以上大雅自卷阿以上言王政之興變小雅自六月以下變大雅自民勞以

下言王政之廢變雅所陳雖若幽厲之世述文武之盛亦主乎譏王政之廢也若宣王之詩有美刺之雜亦主乎歎王政之廢而復興未能全美也政有大小故有小雅焉有大雅焉謂小雅歌一詩則主一事如燕羣臣則歌鹿鳴遣使臣則歌皇華育人才則歌菁莪凡朝廷之政列於詩歌秩秩不相移易政之小也大雅則本乎周家之興祖宗功德其來也久自后稷公劉大王王季以至文武自姜嫄姜女大任以至大

如立國尚仁祈天永命凡有可歌莫不揄揚於天地  
之間始乎受命而終乎求賢所關非止一事政之大  
也政由小而大故小雅先乎大雅也頌者美盛德之  
形容以其成功告於神明也謂周公當武王成王之  
世制為頌詩大抵施之於郊於廟於羣神所美皆前  
人之德德不可見而美其形容彷彿之可見者功非  
遽成而以其功之所自成者告於神明明有禮樂幽  
有鬼神鬼神幽而顯神而且明也如臣工小毖敬之大賚

於廟中封爵助祭始朝而歌之並入於頌皆推本前  
人之德之功君臣上下相率不忘也是謂四始詩之  
至也始端也至極也風一也小雅一也大雅一也頌  
一也是詩之四端也有其端始然後有其名義有其  
篇章有其音調推類而不窮定名而不越是名也理  
極其至無以加之故曰詩之至也

然則關雎麟趾之化王者之風故繫之周公南言化自  
北而南也鵲巢騶虞之德諸侯之風也先王之所以



教故繫之召公周南召南正始之道王化之基是以關  
雎樂得淑女以配君子憂在進賢不淫其色哀窈窕思  
賢才而無傷善之心焉是關雎之義也

然則關雎麟趾之化王者之風鵲巢騶虞之德諸侯  
之風也此謂四始之中風之名義又自別而為三其  
一則列國之風十五豳與周南召南在焉其一則周  
公所為天子后妃房中之樂歌謂之王者之風其一  
則所為諸侯夫人房中之樂歌謂之諸侯之風關雎

葛覃卷耳樛木螽斯桃夭兔罝采芣苢麟趾始乎關雎  
終乎麟趾凡九篇故曰關雎麟趾之化王者之風也  
鵲巢采蘋草蟲采蘋羔羊小星何彼穠矣騶虞始乎  
鵲巢終乎騶虞凡八篇故曰鵲巢騶虞之德諸侯之  
風也德則源於化矣諸侯則視乎天子矣周公之為  
此何也若曰雅施朝廷頌施祭祀天子諸侯閨門燕  
飲獨無樂歌乎故為此風耳其凡則皆言正家之道  
天子自家達之天下諸侯自家達之國此太平之樂

歌而風之純乎正者也故係之周公南言化自北而南先王之所教故係之召公從周公至南言化自北而南凡九字即周南二字也召公二字即召南也此謂文王之為西伯其國中有周召之地周公召公後分采邑採詩者取國俗歌謠以為所貢之詩其人感乎商之習亂而將亡喜乎周之習治而方興故美周而憫商言乎其國未暇及乎天下所以止為文王二南國風周南所得漢廣汝墳二

篇召南所得甘棠行露殷其雷標有梅江有汜野  
有死麕六篇大師之編樂經以王者之風係附於  
周南國風而為第一卷又以諸侯之風係附召南  
國風而為第二卷此以其次第之序而附之也又  
謂文王昔日曾以此詩之理教其家人及其國人  
此以其用詩之理而附之也故大序曰先王之所  
以教而伊川曰古之人有行之者文王是也夫一  
卷之詩篇章殊時將彼附此則若春秋之係日

係月文王之時詩雖未有教以其理不以其辭則  
若黃帝堯舜之取十三卦然而不以關雎而以鵲  
巢何也此因文王之為諸侯而言也嗟乎人但知  
有周南國風而不知有王者之風知有召南國風  
而不知有諸侯之風或以后妃為大姒追稱又以  
夫人為大王王季之妻又以夫人為召南諸侯之  
妻皆非也故凡王者諸侯之風不指乎文王者皆  
風人之立義為天下萬世后妃夫人之法也周南

召南正始之道王化之基此謂二南國風所詠乃  
文王正心誠意齊家治國之所感召江沱漢汝之  
婦人女子彼亦何知而皆由夫婦之理明君臣之  
義當紂之時何等風俗文王之國藹然禮義如此  
大人正己而物正豈非文王有以陰驅潛率之乎  
其後八百年之風聲氣習皆由乎是信乎為正始  
之道王化之基也孔子曰人而不為周南召南其  
猶正牆面而立也歟蓋欲學者習其文辭翫其音

讀察其意味講其義理而心通默識之由本至末由  
內及外由體之用見於躬行踐履之間也夫婦之禮  
不由君臣之義不明雖日誦二南猶牆面也噫詩之  
大序最後一段言風及雅言雅及頌言頌及王者諸  
侯之風言王者諸侯之風又及二南之風而歸之王  
化夫化者本也政次之功成又次之反覆而求優哉  
游哉可不務乎

葛覃后妃之本也后妃在父母家則志在於女功之事

躬儉節用服澣濯之衣尊敬師傅則可以歸安父母化

天下以婦道也

謹案自此篇至鄭風末小序解永樂大典皆缺卷

卷耳后妃之志也又當輔佐君子求賢審官知臣下之勤勞內有進賢之志而無險詖私謁之心朝夕思念至於憂勤也

樛木后妃逮下也言能逮下而無嫉妒之心焉

螽斯后妃子孫衆多也言若螽斯不妒忌則子孫衆多也



桃夭后妃之所致也不妒忌則男女以正婚姻以時國  
無鰥民也

兔置后妃之化也關雎之化行則莫不好德賢人衆多  
也

采芣后妃之美也和平則婦人樂有子矣

漢廣德廣所及也文王之道被於南國美化行乎江漢  
之域無思犯禮求而不可得也

汝墳道化行也文王之化行於汝墳之國婦人能閔其

君子猶勉之以正也

麟之趾闕雉之應也闕雉之化行則天下無犯非禮雖  
衰世之公子皆信厚如麟趾之時也

鵲巢夫人之德也國君積行累功以致爵位夫人起家  
而居有之德如鳴鳩乃可以配焉

采蘋夫人不失職也夫人可以奉祭祀則不失職矣  
草蟲大夫妻能以禮自防也

采蘋大夫妻能循法度也能循法度則可以承先祖共

祭祀矣

甘棠美召伯也召伯之教明於南國

行露召伯聽訟也衰亂之俗微貞信之教興彊暴之男不能侵陵貞女也

羔羊鵲巢之功致也召南之國化文王之政在位皆節儉正直德如羔羊也

殷其雷勸以義也召南之大夫遠行從政不遑寧處其室家能閑其勤勞勸以義也

標有梅男女及時也召南之國被文王之化男女得以及時也

小星惠及下也夫人無妬忌之行惠及賤妾進御於君知其命有貴賤能盡其心矣

江有汜美媵也勤而無怨嫡能悔過也文王之時江沱之間有嫡不以其媵備數媵遇勞而無怨嫡亦自悔也野有死麕惡無禮也天下大亂彊暴相陵遂成淫風被文王之化雖當亂世猶惡無禮也

何彼襮矣美王姬也雖則王姬亦下嫁於諸侯車服不繫其夫下王后一等猶執婦道以成肅雝之德也

騶虞鵲巢之應也鵲巢之化行人倫既正朝廷既治天下純被文王之化則庶類蕃殖蒐田以時仁如騶虞則王道成也

柏舟言仁而不遇也衛頃公之時仁人不遇小人在側綠衣衛莊姜傷已也妾上僭夫人失位而作是詩也

燕燕衛莊姜送歸妾也

日月衛莊姜傷已也遭州吁之難傷已不見答於先君以至困窮之詩也

終風衛莊姜傷已也遭州吁之暴見侮慢而不能正也擊鼓怨州吁也衛州吁用兵暴亂使公孫文仲將而平陳與宋國人怨其勇而無禮也

凱風美孝子也衛之淫風流行雖有七子之母猶不能安其室故美七子能盡其孝道以慰其母心而成其志爾

雄雉刺衛宣公也淫亂不恤國事軍旅數起大夫久役男女怨曠國人患之而作是詩

匏有苦葉刺衛宣公也公與夫人並為淫亂

谷風刺夫婦失道也衛人化其上淫於新昏而棄其舊室夫婦離絕國俗傷敗焉

式微黎侯寓於衛其臣勸以歸也

旄丘責衛伯也狄人迫逐黎侯黎侯寓于衛衛不能修方伯連率之職黎之臣子以責于衛也

簡兮刺不用賢也衛之賢者仕於伶官皆可以承事王者也

泉水衛女思歸也嫁於諸侯父母終思歸寧而不得故作是詩以自見也

北門刺仕不得志也言衛之忠臣不得其志爾

北風刺虐也衛國並為威虐百姓不親莫不相攜持而去焉

靜女刺時也衛君無道夫人無德



新臺刺衛宣公也納伋之妻作新臺於河上而要之國人惡之而作是詩也

二子乘舟思伋壽也衛宣公之二子爭相為死國人傷而思之而作是詩也

柏舟共姜自誓也衛世子共伯蚤死其妻守義父母欲奪而嫁之誓而弗許故作是詩以絕之

牆有茨衛人刺其上也公子頑通乎君母國人疾之而不可道也

君子偕老刺衛夫人也夫人淫亂失事君子之道故陳人君之德服飾之盛宜與君子偕老也

桑中刺奔也衛之公室淫亂男女相奔至於世族在位相竊妻妾期於幽遠政散民流而不可止

鶉之奔奔刺衛宣姜也衛人以為宣姜鶉鶉之不若也定之方中美衛文公也衛為狄所滅東徙渡河野處漕邑齊桓公攘戎狄而封之文公徙居楚丘始建城市而營宮室得其時制百姓說之國家殷富焉

蝮螫止奔也衛文公能以道化其民淫奔之耻國人不齒也

相鼠刺無禮也衛文公能正其羣臣而刺在位承先君之化無禮儀也

干旄美好善也衛文公臣子多好善賢者樂告以善道也

載馳許穆夫人作也閔其宗國顛覆自傷不能救也衛懿公為狄人所滅國人分散露於漕邑許穆夫人閔衛

之亡傷許之小力不能救思歸唁其兄又義不得故賦是詩也

淇奥美武公之德也有文章又能聽其規諫以禮自防故能入相於周美而作是詩也

考槃刺莊公也不能繼先公之業使賢者退而窮處碩人閔莊姜也莊公惑於嬖妾使驕上僭莊姜賢而不答終以無子國人閔而憂之

氓刺時也宣公之時禮義消亡淫風大行男女無別遂

相奔誘華落色衰復相棄背或乃困而自悔喪其妃耦  
故序其事以風焉美反正刺淫佚也

竹竿衛女思歸也適異國而不見答思而能以禮者也  
芟蘭刺惠公也驕而無禮大夫刺之

河廣宋襄公母歸於衛思而不止故作是詩也

伯兮刺時也言君子行役為王前驅過時而不反焉

有狐刺時也衛之男女失時喪其妃耦焉古者國有凶  
荒則殺禮而多昏會男女之無夫家者所以育人民也

木瓜美齊桓公也衛國有狄人之敗出處於漕齊桓公救而封之遺之車馬器服焉衛人思之欲厚報之而作是詩也

黍離閔宗周也周大夫行役至於宗周過故宗廟宮室盡為禾黍閔周室之顛覆徬徨不忍去而作是詩也

君子于役刺平王也君子行役無期度大夫思其危難以風焉

君子陽陽閔周也君子遭亂相招為祿仕全身遠害而

已

揚之水刺平王也不撫其民而遠屯戍於母家周人怨思焉

中谷有雅閔周也夫婦日以衰薄凶年饑饉室家相棄爾

兔爰閔周也桓王失信諸侯背叛構怨連禍王師傷敗君子不樂其生焉

葛藟王族刺平王也周室道衰棄其九族焉

采葛懼讒也

大車刺周大夫也禮義陵遲男女淫奔故陳古以刺今大夫不能聽男女之訟焉

丘中有麻思賢也莊王不明賢人放逐國人思之而作是詩也

緇衣美武公也父子並為周司徒善於其職國人宜之故美其德以明有國善善之功焉

將仲子刺莊公也不勝其母以害其弟叔失道而公弗



制祭仲諫而公弗聽小不忍以致大亂焉

叔于田刺莊公也叔處于京繕甲治兵以出于田國人說而歸之

大叔于田刺莊公也叔多才而好勇不義而得衆也

清人刺文公也高克好利而不顧其君文公惡而欲遠之不能使高克將兵而禦狄於竟陳其師旅翱翔河上久而不召衆散而歸高克奔陳公子素惡高克進之不以禮文公退之不以道危國亡師之本故作是詩也

羔裘刺朝也言古之君子以風其朝焉

遵大路思君子也莊公失道君子去之國人思望焉

女曰雞鳴刺不說德也陳古義以刺今不說德而好色也

有女同車刺忽也鄭人刺忽之不昏於齊太子忽嘗有  
功於齊齊侯請妻之齊女賢而不取卒以無大國之助  
至於見逐故國人刺之

山有扶蘇刺忽也所美非美然

彗兮刺忽也君弱臣彊不倡而和也

狡童刺忽也不能與賢人圖事權臣擅命也

褰裳思見正也狂童恣行國人思大國之正已也

丰刺亂也昏姻之道缺陽倡而陰不和男行而女不隨東門之墦刺亂也男女有不待禮而相奔者也

風雨思君子也亂世則思君子不改其度焉

子衿刺學校廢也亂世則學校不修焉

揚之水閔無臣也君子閔忽之無忠臣良士終以死亡

而作是詩也

出其東門閔亂也公子五爭兵革不息男女相棄民人思保其室家焉

野有蔓草思遇時也君之澤不下流民窮於兵革男女失時思不期而會焉

溱洧刺亂也兵革不息男女相棄淫風大行莫之能救焉

雞鳴思賢妃也哀公荒淫怠慢故陳賢妃貞女夙夜警言

戒相成之道焉

古之聖賢未有不勤於夙興者孟子雞鳴而起孳孳  
為善舜之徒也禹惜寸陰成湯周公坐以待旦夫晝  
以訪問夜以安身聖賢曷嘗焦勞勤苦若是哉蓋良  
心易梏夜氣所存精明統一平旦接物存之則好惡  
近乎人旦晝所為梏而又梏則放心不遠於禽獸聖  
賢所懼也故書有夙夜浚明亦有昧爽丕顯之語浚  
明者日宣三德早夜思之須明行之昧爽者昧明之

時思大明其德待旦而行之夫如是則勤於夙興有不能安寢者抑亦閨門之內淑女好述警戒相成之助歟哀公齊太公之五世而荒淫怠慢變風之刺遽由茲始思昔尚父受封萊人侵疆一聞客說不遑旅寐而五世之孫乃若是其怠可不戒哉詩人不徒刺哀公而思賢妃貞女之助有所感而云也大抵風始關雎不淫其色君臣民庶可以通習周王晏朝則有關雎興誦后妃脫珥者房中之樂有益如此齊哀

不能夙興夫人無警戒之言風人陳道秉彝者豈不  
深憂君子因風之始變而觀其譏刺亦本於衽席故  
曰易首乾坤書釐二女詩係二南禮記云身修而家  
齊家齊而國治國治而天下平人道之大可不兢兢  
歟

還刺荒也哀公好田獵從禽獸而無厭國人化之遂成  
風俗習於田獵謂之賢閑於馳逐謂之好馬

三章皆士大夫相答之辭上有所好下必甚焉

著刺時也時不親迎也

門內謂之著親迎之禮孔子與哀公言之詳矣

東方之日刺衰也君臣失道男女淫奔不能以禮化也  
日月取象君臣不能照下亦言朝昏相從無所忌憚  
之意

東方未明刺無節也朝廷興居無節號令不時挈壺氏  
不能掌其職焉

古者挈壺掌漏雞人告時挈壺氏周司馬之屬有之



其官下士六人挈讀如潔髮之潔挈者懸繫之名刻  
謂置箭壺內刻以為節浮之水上令水漏而刻下以  
記晝夜昏明之度數

南山刺襄公也鳥獸之行淫乎其妹大夫遇是惡作詩  
而去之

甫田大夫刺襄公也無禮義而求大功不修德而求諸  
侯志大心勞所以求者非其道也

有義而後功立惟德可以來人求大功者欲求為霸

主也天子衰諸侯興故曰霸緯侯書注云把天子之事國語齊莊僖於是乎小伯韋昭曰襄即莊孫僖子以父祖已為盟會之長可為霸業之基又自以國大民衆負恃強力故求為霸也至其弟桓公求而得之盧令刺荒也襄公好田獵畢弋而不修民事百姓苦之故陳古以風焉

畢以掩兔爾雅噉謂之畢注陰氣獨起陽氣必止畢或曰噉因星形以名之網小而柄長弋以射雁以繩

繫矢而射鳥曰繳射此游田逐禽而不修治民之事  
詩人言有德之君順時田獵與百姓共樂同獲百姓  
聞而說之

敝筍刺文姜也齊人惡魯桓公微弱不能防閑文姜使  
至淫亂為二國患焉

虎賁舍則守王閑注王出所止宿桂柅也掌舍會同  
之舍桂柅再重謂行馬也周衛有外內列周衛防守  
之物名之曰閑

載驅齊人刺襄公也無禮義故盛其車服疾驅於通道大都與文姜淫播其惡於萬民焉

諸序獨此舉國之名見通國之人皆嫉之也

猗嗟刺魯莊公也齊人傷魯莊公有威儀技藝然而不能以禮防閑其母失子之道人以為齊侯之子焉

謂莊公形貌之長面目之美善於趨步長於舞射不能哀痛以思父端莊以正身威刑以肅下而更有他日求昏之志焉是莊公之可耻也

葛屨刺褊也魏地陜隘其民機巧趨利其君儉嗇褊急而無德以將之

德者何中正不偏之謂也

汾沮洳刺儉也其君儉以能勤刺不得禮也

此詩自言公族之儉詩人謂雖化其君之儉勤而不知本於禮度耳非謂魏君之采莫采蕢也

園有桃刺時也大夫憂其君國小而迫而儉以嗇不能用其民而無德教日以侵削故作是詩也

大夫憂其國之將亡也

陟謁孝子行役思念父母也國迫而數侵削役乎大國  
父母兄弟離散而作是詩也

十畝之間刺時也言其國削小民無所居焉

十畝陘隘不足耕墾以居生

伐檀刺貪也在位貪鄙無功而受祿君子不得進仕爾  
言君子不素餐以責小人之貪也

碩鼠刺重斂也國人刺其君重斂蠶食於民不修其政

貪而畏人若大鼠也

民至以碩鼠刺重斂者其國可知矣

蟋蟀刺晉僖公也儉不中禮故作是詩以閔之欲其及時以禮自虞樂也此晉也而謂之唐本其風俗憂深思遠儉而用禮乃有堯之遺風焉

憂深思遠孔氏曰諸篇皆有深遠之意

山有樞刺晉昭公也不能修道以正其國有財不能用有鐘鼓不能以自樂有朝廷不能洒埽政荒民散將以

危亡四鄰謀取其國家而不知國人作詩以刺之也

四鄰即桓叔謀伐晉也

揚之水刺晉昭公也昭公分國以封沃沃盛彊昭公微弱國人將畔而歸沃焉

桓叔有德沃是大都國人叛從桓叔國危矣而昭公不知春秋之前惠二十四年晉始亂封桓叔于曲沃三十年晉潘父謀弑昭公而納桓叔不克君子忠於晉而為此詩樂而不憂從沃者不敢告人愛昭公者



叔聊刺晉昭公也君子見沃之盛彊能修其政知其蕃衍盛大子孫將有晉國焉

綢繆刺晉亂也國亂則昏姻不得其時焉

此男女俱怨不得其時也

杖杜刺時也君不能親其宗族骨肉離散獨居而無兄弟將為沃所并爾

曲沃盛而晉微宗族必有歸曲沃者君又不能親親而使之離散是可憂也春秋翼九宗五正之子嘉父

逆晉侯于隨納諸鄂謂之鄂侯唐叔始封受懷姓九  
宗職官五正世為晉彊家五正五官之長九宗一姓  
九族晉非無宗族不能親之也非無彊家不能用之  
也

羔裘刺時也晉人刺其在位不恤其民也

刺朝廷卿大夫也

鵠羽刺時也昭公之後大亂五世君子下從征役不得養  
其父母而作是詩也

無衣美晉武公也武公始并晉國其大夫為之請命乎  
天子之使而作是詩也

有杖之杜刺晉武公也武公寡特兼其宗族而不能求  
賢以自輔焉

葛生刺晉獻公也好攻戰則國人多喪矣

采芩刺晉獻公也獻公好聽讒焉

獻公之信讒最著於申生又殺羣公子慘矣

車鄰美秦仲也秦仲始大有車馬禮樂侍御之好焉

秦仲始大謂國土始大未得封爵也襄公始命者謂襄始命為諸侯也好者君之容好也鄭語史伯對桓公曰秦仲齊侯姜嬴之後也且大其將興乎駟驥美襄公也始命有田狩之事園囿之樂焉

小戎美襄公也備其甲兵以討西戎西戎方彊而征伐不休國人則矜其車甲婦人能閔其君子焉

襄公備車馬以討西戎亦大義所當然耳然民可使之勇戰不可使之好戰也

蒯瞶刺襄公也未能用周禮將無以固其國焉

襄公新得周地其民被周德教日久見襄公之所為  
不能用周禮也君子知其將無以固國焉或曰襄公  
之國乃至於其子孫有天下安在其不能固乎曰是  
不然三代之秦繇繇不絕千載矣襄公一為諸侯驟  
盛而有中衰之兆至始皇有天下而子孫不能聚廬  
而託處其固安在哉

終南戒襄公也能取周地始為諸侯受顯服大夫美之

故作是詩以戒勸之

地理志扶風武功縣東有太山古文以為終南是周地之名山昭四年左傳荆山中南九州之險一名中南所論周之險阻不當以封秦於此益驗矣

黃鳥哀三良也國人刺穆公以人從死而作是詩也  
晨風刺康公也忘穆公之業始棄其賢臣焉

晨風鸛摯鳥也似鷓鴣青黃燕頤勾喙嚮風搖翅乃因風飛急疾擊鳩鵲燕雀食之詩言欽欽者謂穆公也

忘我者謂康公也

無衣刺用兵也秦人刺其君好攻戰亟用兵而不與民同欲焉

渭陽康公念母也康公之母晉獻公之女文公遭麗姬之難未反而秦姬卒穆公納文公康公時為太子贈送文公於渭之陽念母之不見也我見舅氏如母存焉及其即位思而作是詩也

晉文公獻公子秦康公之舅也秦穆夫人秦康公之

母亦晉獻公之女文公異母姊也文公生於狐姬夫  
人生於齊姜婦人以姓為字曰齊姜係於本國如曰  
秦姬則又係於夫之國也文公未反國康公母秦姬  
已卒穆公納文公康公為太子贈送文公於渭陽見  
舅思母及其即位晉文公已卒秦康公追舊日渭陽  
送舅思母之情而為此詩

權輿刺康公也忘先君之舊臣與賢者有始而無終也  
宛丘刺幽公也淫荒昏亂游蕩無度焉



東門之粉疾亂也幽公淫荒風化之所行男女棄其舊業亟會於道路歌舞於市井爾

古者因井為市井田之中亦可交易

衡門誘僖公也愿而無立志故作是詩以誘掖其君也東門之池刺時也疾其君之淫昏而思賢女以配君子也

經三章皆思得賢女之事

東門之楊刺時也昏姻失時男女多違親迎女猶有不

至者也

墓門刺陳佗無良師傅以至於不義惡加於萬民焉  
防有鵲巢憂讒賊也宣公多信讒君子憂懼焉

月出刺好色也在位不好德而說美色焉

株林刺靈公也淫乎夏姬馳驅而往朝夕不休息焉

君臣淫於其國國人效之躬行之移風俗也如此

澤陂刺時也言靈公君臣淫於其國男女相說憂思感  
傷焉

羔裘大夫以道去其君也國小而迫君不用道好潔其衣服逍遙遊燕而不能自彊於政治故作是詩也

三諫不從待放於郊賜之玦而後行古之道也去君而猶思君卷卷之忠也檜國鄰於虢而居於濟洛河潁之間鄭將兼弱攻昧取亂侮亡焉故曰國小而迫也君不用道好潔其衣服所謂四鄰謀取其國家而不知也

素冠刺不能三年也

三年之喪天下之通喪也子生三年然後免於父母之懷將由夫窮無窮極無極與則終身而慕哀未可已雖然禮有節文聖人為之制也其有安於食稻衣錦者幾無人心焉耳是故苴麻之服慘戚之容必稱練祥之祭哭泣之節有殺不飲酒不食肉倚廬而居枕塊而寢端席而坐朝奠夕徹夕奠朝徹事死如事生事亡如事存不疾不薑桂不塋不除服夫是之謂行三年之喪也不然服其服而無其容容其容而無其

心猶不能行也

隰有萋楚疾恣也國人疾其君之淫恣而思無情慾者  
也

匪風思周道也國小政亂憂及禍難而思周道焉

周室入厲而壞至宣而興至幽而大壞檜將并於鄭  
而其君不能自存其臣思周道之盛時王室尊安諸  
侯之國小大皆奠其居也

蜉蝣刺奢也昭公國小而迫無法以自守好奢而任小

人將無所依焉

迫脅於大國之間無治國之法以自守好為奢侈而任用小人國家危亡無日君將無所依焉

候人刺近小人也共公遠君子而好近小人焉

鴈鵠刺不壹也在位無君子用心之不壹也

四章皆舉善以駁時之惡鴈鵠結鞠其養七子也旦從上而下暮從下而上

下泉思治也曹人疾共公侵刻下民不得其所憂而思

明王賢伯也

明王賢伯於諸侯能督察之紀理之勞來之

七月陳王業也周公遭變故陳后稷先公風化之所由致王業之艱難也

周公為七月之詩陳述周家興王之功業也周公相成王成王幼管叔蔡叔流言周公居東征之其身離乎朝廷其心在乎王室遭此變故恐成王之惑於流言而不知創造守成之不易凡公之所為鞠躬盡瘁

者蓋欲扶持王業之已成而昔者未成之初自后稷  
以來繼世曾孫有公劉居豳地前不窋而後太王接  
虞施商以肇周祀其風動教化國人之所自來蓋歷  
千有數百餘年之久漸漬而後成致我周家興王之  
功業如此其艱難也君幼矣吾又不以身當之其無  
壞我室乎故陳其所由與其所以致者皆在農桑之  
務禮義之績其意深矣遠矣豳者戎狄之地名在雍  
州岐山之北漢屬古扶風郿邑周公為是詩也太師



述之為豳國風焉蓋於祭祀之時亦有吹豳籥而歌  
豳詩者鄭譜以為公劉太王居邠之風俗蓋太王未  
遷岐以前猶在邠觀其來邠止旅迺密及其遷岐從  
如歸市可見周人之愛君也

鵲鴉周公救亂也成王未知周公之志公乃為詩以遺  
王名之曰鵲鴉焉

鵲鴉之詩乃周公救亂所為也成王未知周公之志  
者以惑於管蔡之流言也公乃為此詩以遺王欲王

之察其中心也

東山周公東征也周公東征三年而歸勞歸士大夫美之故作是詩也一章言其完也二章言其思也三章言其室家之望女也四章樂男女之得及時也君子之於人序其情而閔其勞所以說也說以使民民忘其死其惟東山乎

東山之詩乃大夫述周公東征而歸勞歸士之意也歸士述家人之言周公述歸士之言大夫述周公之

言未必有其言而有其意大夫足而成之周公攝政  
元年有管蔡及武庚淮夷之叛故居東征之歷涉三  
年而歸凡征行莫不辛苦上知之而能言之則為治  
世上不知之而下自言之則為亂世

破斧美周公也周大夫以惡四國焉

伐柯美周公也周大夫刺朝廷之不知也

周公攝政東征四國既定仍在東土此詩已遺鷓鴣  
之後未得雷風之前之詩也周公之美而朝廷之刺

周公豈欲其有是哉

九畹美周公也周大夫刺朝廷之不知也

狼跋美周公也周公攝政遠則四國流言近則王不知周大夫美其不失其聖也

美其進退有難而能不失其聖也周公誅伐四國成就周道使天下太平而聖德著明致政之後欲老而自退成王又留為太師令輔弼左右非不知周公也特惑于其初耳